

四庫全書

子部

欽定四庫全書

子部

神農本草經疏卷

三五

詳校官太醫院吏目宋桂

編修臣倉聖脈覆勘

總校官進士臣繆琪

校對官中書臣吳俊

謄錄監生臣羅翮遠

欽定四庫全書

神農本草經疏卷三

明繆希雍撰

玉石部上品

總七十三種今疏其要者一十四種

丹砂

雲母

石鍾乳

礬石

芒硝

朴硝

玄明粉

滑石

空青

紫石英

赤石脂

無名異

綠礬

鐵鏽

丹砂味甘微寒無毒主身體五藏百病養精神安魂魄  
益氣明目通血脉止煩滿消渴益精神悅澤人面殺精  
魅邪惡鬼除中惡腹痛毒氣疥癩諸瘡久服通神明不  
老輕身神仙能化為汞作末名真朱光色如雲母可析

者良

惡磁石  
畏鹹水

疏○丹砂本稟地二之火氣以生而兼得乎天七之

氣以成色赤法火中含水液為龍為汞亦曰陰精七  
為陽火之少故味甘微寒而無毒蓋指生砂而言也  
藥性論云丹砂君為清鎮少陰君火之上藥辟除鬼  
魅百邪之神物安定神明則精氣自固火不妄炎則  
金木得平而魂魄自定氣力自倍五臟皆安則精華  
上發故明目心主血脉心火寧謚則陰分無熱而血  
脉自通煩滿自止消渴自除矣殺精魅邪惡鬼除中  
惡腹痛者陽明神物故應辟除不祥消散陰惡殺厲

之氣也久服通神明不老者古之真人飛丹煉石引  
納清和配以金鉛按之法象自能合丹道而成變化  
也青霞子及太清服煉靈砂法云能重能輕能暗能  
明能黑能白能神能靈一斛人擎力難舉升萬斤遇  
火輕速上騰鬼神尋求莫知所在先稟氣於甲受氣  
於丙出胎見壬結魄成庚增光歸戊陰陽升降各本  
其原非虛語矣

主治參互

丹砂研飛極細令狀如飛塵以甘草生地黃濃煎調  
分許與兒初生時服之能止胎驚解胎毒 同真珠  
琥珀金箔牛黃生犀角天竺黃滑石末治小兒急驚  
有神 入六一散治暑氣伏於心經神昏口渴及泄  
瀉如火熱 入補心丹鎮心神定魂魄 入乳香托  
裏散散癰疽熱毒發熱痲痛及毒氣攻心發譫語

簡誤

丹砂為八石之主故列石部之首體中含汞汞味本

辛故能殺蟲殺精魅宜乎藥性論謂其有大毒若經  
伏火及一切烹煉則毒等砒礪服之必斃自唐以來  
上而人主下而縉紳曾餌斯藥鮮克免者戒之戒之  
雲母味甘平無毒主身皮死肌中風寒熱如在車船上  
除邪氣安五藏益子精明目下氣堅肌續絕補中療五  
勞七傷虛損少氣止痢久服輕身延年悅澤不老耐寒  
暑志高神仙一名雲珠色多赤一名雲華五色具一名  
雲英色多青一名雲液色多白一名雲砂色青黃一名



磷石色正白

澤瀉為之使忌羊  
血用礬石則柔爛

疏○雲母本經載其味甘氣平詳其主治亦應有溫  
韓保昇曰雲母色白而主肺此石藥中溫良之品也  
以其法金故主身皮死肌及中風寒熱如在車船上  
甘能緩溫能和故除邪氣石性鎮墜能使火下火下  
則水上是既濟之象也故安五臟益子精明目久服  
輕身延年別錄主下氣堅肌續絕補中療五勞七傷  
虛損少氣久服悅澤不老耐寒暑志高神仙皆此意

也其曰止痢者久痢則腸胃俱虛甘溫足以回其虛  
下墜足以去其積故亦主之也

主治叅互

雲母得鉛丹熬成膏可貼一切癰疽瘡毒和以昇丹  
細末更著竒效 經驗方云青城山丈人觀主康道  
豐治百病雲母粉方用雲母一斤析開揉入大瓶內  
築實封固以十斤頂火煅赤取出却拌香菝紫連翹  
草二件合搗如泥後以夾絹袋盛於大水盆內搖取

粉餘滓未盡再添草藥重搗取粉以木盆一面貯灰於灰上印一淺坑鋪紙傾粉在內候乾焙之以面糊丸梧子大遇有疾者服之無不效知成都府辛諫議曾患大風衆醫不愈道豐進此服之神驗 千金方服食雲母法上白雲母二十斤薄劈以露水八斗作湯分半淘淨二次又作二斗湯納芒硝十斤木器中浸二十日取出絹袋盛懸屋上勿見風日令燥以鹿皮為囊揉之從旦至午篩滓復揉得好粉二十斤攪

糊入竹筒內薄削封口漆固北垣南下入地六尺覆  
土春夏四十日秋冬三十日出之當成水若洞洞不  
消更埋三十日此水能治萬病及勞氣風疼每以溫  
水一合和服之日三服十日小便當變黃二十日腹  
中寒澀消三十日齟齬更生四十日不畏風寒五十  
日諸病皆愈顏色日少長生神仙 深師方治痰飲  
頭痛往來寒熱雲母粉二兩鍊過常山一兩為末每  
服方寸匕湯服取吐忌葱生菜 仲景金匱方治

牝瘡多寒雲母燒二日夜龍骨蜀漆燒去腥等分為  
未發前漿水服半錢 千金方治赤白久痢積年不  
愈飲調雲母粉方寸匕服神效 又方治婦人帶下  
水和雲母粉方寸匕服神效 積德堂方治婦人難  
產經日不生雲母粉半兩溫酒調服入口即產不順  
者即順萬不失一陸氏云此是何德揚方也巳救三  
五十人 千金方治風癩遍身百計不愈煨雲母粉  
清水調服二錢良 又方治一切惡瘡用雲母粉傅

之 聖惠方治火瘡敗壞雲母粉和生羊髓傅之  
事林廣記治金瘡出血雲母粉敷之絕妙 千金翼  
治風熱汗出水和雲母粉服三錢不過再服立愈

簡誤

雲母性雖甘平終屬石種與臟腑氣血實非同類祇  
宜用以治病取效若夫益精明目輕身延年耐寒暑  
志高神仙皆必不然之論也姑俟世人試過乃敢信  
耳

石鍾乳味甘溫無毒主欬逆上氣明目益精安五臟通  
百節利九竅下乳汁益氣補虛損療脚弱痿冷下焦傷  
竭強陰久服延年益壽好顏色不老令人有子不煉服  
之令人淋

蛇床為之使惡壯  
丹玄參紫石英

疏○石鍾乳稟石之氣而生本經謂其味甘氣溫無  
毒吳普曰神農辛斯言近之甄權以為有大毒或是  
經火之故應云味甘辛氣大溫其性得火則有大毒  
乃為得之其主效逆上氣者以氣虛則不得歸元發

為斯證乳性溫而鎮墜使氣得歸元則病自愈故能  
主之也通百節利九竅下乳汁者辛溫之力也療脚  
弱痰冷者亦是陽氣下行之驗也甄權主寒嗽通聲  
者辛以散邪結溫以祛寒氣故也其他種種補益之  
說當是前人好事者溢美之辭夷考其性恐無是理  
未足信也

主治參互

石鍾乳得牛黃白臘象牙末真珠乳香沒藥樺皮灰



龜板灰俱存性細研枯白礬蛙竹屑紅鉛治廣瘡結  
毒爛壞鼻梁及陰蝕陽物有神 孫真人千金翼鍾  
乳煎治風虛勞損腰脚無力補益強壯用鍾乳粉煉  
成者三兩以夾絹袋盛之牛乳一大升煎減三之一  
去袋飲乳分二服日一作不吐不利虛冷人微溲無  
所苦一袋可煮三十度力盡別作袋每煎訖須濯淨  
令通氣其滓和麩煨雞子食之此崔尚書方也 宣  
明方治一切勞嗽胸膈痞滿焚香透膈散用鵝管石

雄黃佛耳草款冬花等分為末每用一錢安香爐上  
焚之以筒吸煙入喉中日二次 聖濟錄治肺虛喘  
急連綿不息生鍾乳粉光明者五錢蠟三兩化和飯  
甌內蒸熟研丸如梧子大每水下一丸 外臺秘要  
治乳汁不通氣少血衰脉澀不行故少乳煉成鍾乳  
粉二錢濃煎漏蘆湯調下或通草等分為末米飲服  
方寸七日三服

簡誤

石鍾乳辛溫若加火煨有毒無疑縱治虛寒尚須審  
察況病涉溫熱者耶世人病陰虛有熱者十之九陽  
虛內寒者百之一是以自唐迄今因服鍾乳而發病  
者不可勝紀服之而獲效得力者不聞一二其於事  
理可以燭照經曰石藥之性悍味斯言也則其大畧  
可槩見已慎毋輕信方士之言致蹈前人覆轍尊生  
之士宜安常處順以道理自持脩短有命無惑乎長  
年之說庶不為其所誤矣

礬石味酸寒無毒主寒熱洩痢白沃陰蝕惡瘡目痛堅骨齒除固熱在骨髓去鼻中息肉煉餌服之輕身不老增年岐伯云久服傷人骨能使鐵為銅生河西山谷及

隴西武都石門

甘草為之使惡  
牡蠣畏麻黃

疏○礬石味酸氣寒而無毒其性燥急收澀解毒除熱墜濁蓋寒熱洩痢皆溼熱所為婦人白沃多由虛脫澀以止脫故也陰蝕惡瘡亦緣溼火目痛多由風熱除固熱在骨髓堅齒者髓為熱所劫則空故骨痿

而齒浮礬性入骨除熱故亦主之去鼻去息肉者消  
毒除熱燥溼之功也

主治參互

礬石即白礬得巴豆同煨令枯取礬研末以鵝翎管  
吹入喉中流出熱涎立解喉痺其證俗呼為纏喉風  
是也 皮膚疥癬膿窠坐板肥疔等瘡皆資其用各  
合所宜以施之 得硫黃雄黃白附子海金沙蜜陀  
僧擦汗斑殊效一年者去皮一次十年者去皮十次

擦後坐卧勿當風勿行房搖扇 制半夏能散溼痰  
及食積痰兼除五飲 同芒硝可燒水銀成粉治一  
切瘡中有蟲 得黃蠟和丸名蠟礬丸治一切腫毒  
有神凡治癰疽當服之以護膜膜苟不破雖劇必瘥  
陳師古方中風痰厥四肢不收氣閉膈塞者白礬  
一兩牙皂角五錢為末每服一錢溫水調下吐痰為  
度 簡要濟衆方牙齒腫痛白礬一兩燒灰大露蜂  
房一兩微炙每二錢水煎含漱去涎 千金方鼻中

息肉用明礬一兩蓖麻仁七粒鹽梅肉五個麝香一  
字搗丸綿裹塞之化水自下也 夏子益竒疾方發

斑怪證有人眼赤鼻張大喘渾身出斑毛髮如銅鐵  
乃熱毒氣結於下焦也白礬滑石各一兩為末水三  
碗煎減半不住服盡即安 永類鈴方爛弦風眼白

礬煨一兩銅青三錢研末湯泡澄清點洗 千金方  
脚氣衝心白礬三兩水一斗五升煎沸浸洗 張仲

景金匱方女勞黃疸日晡發熱而反惡寒膀胱急少

腹滿目盡黃額上黑足下熱因作黑疸其腹脹如水  
狀大便必黑時溇此女勞之病非水也自大勞大熱  
交接後入水所致腹滿者難治用礬石燒消石熬黃  
等分為散以大麥粥汁和服方寸匕日三服病從大  
小便去 又金匱方婦人白沃經水不利子臍堅癢  
中有乾血下白物用礬石燒杏仁一分研勻蜜丸棗  
核大納入腸中日一易之 千金翼婦人陰脫作痒  
礬石燒研空心酒服方寸匕日三 劉禹錫傳信方



蛇咬蝎螫燒刀矛頭令赤置白礬於上汁出熱滴之  
立瘥此神驗之方也

簡誤

白礬本經主寒熱洩痢此蓋指洩痢久不止虛脫滑  
洩因發寒熱礬性過澀澀以止脫故能主之假令溼  
熱方熾積滯正多誤用收澀為害不一慎之婦人白  
沃多由虛脫故用收澀以固其標終非探本之治目  
痛不由弩肉及有外障亦非所宜除固熱在骨髓僅

可資其引導若謂其獨用反有損也礬性燥急而能  
劫水故不利齒骨齒者骨之餘故也岐伯云久服傷  
人骨故凡陰虛內熱火熾水涸發為咽喉痛者不宜  
含此目痛由陰虛血熱者亦不宜用劫水損骨之藥  
豈可煉服輕身不老增年徒虛語耳

芒硝味辛苦大寒主五藏積聚久熱胃閉除邪氣破留  
血腹中痰實結搏通經脈利大小便及月水破五淋推  
陳致新生於朴硝

疏○芒硝稟天地至陰極寒之氣所生故味苦辛性  
大寒乃太陰之精以消物為性故能消五金八石况  
乎五臟之積聚其能比之金石之堅哉久熱即是邪  
熱傷寒熱邪結中焦或停飲食則胃脹閉少少投之  
可立蕩除除邪氣者寒能除熱故也破留血者鹹能  
軟堅辛能散結也邪熱盛則經脈閉熱淫於內治以  
鹹寒結散熱除則經脈自通二便自利月水復故五  
淋中惟石淋膏淋為膠結難解病由於積熱非得辛

苦大寒之藥以推蕩消散之不能除也推陳致新總述其體用之功耳由朴硝再煎而成故曰生於朴硝

主治參互

入仲景大承氣湯治傷寒七八日後邪結下焦少腹按之堅痛下之愈 又治傷寒邪熱失汗蓄血少腹或先因內傷留血下焦入桃仁承氣湯下之愈 千金方療漆瘡用湯漬芒硝令濃塗之如乾即易之

子母秘錄治小兒赤遊行於體上下至心即死以芒

硝納湯中取濃汁以拭丹上 百一選方治療關格  
大小便不通脹滿欲死兩三日則殺人以芒硝三兩  
紙裏三四重炭火燒之令內一升湯中盡服當先飲  
湯一升已吐出乃服之 孫真人食忌主眼有翳取  
芒硝一大兩置銅器中急火上煉之放冷後以生絹  
細羅點眼角中每夜欲卧時一度點妙 姚和衆方  
治小兒重舌馬牙硝塗於舌上下三日效 簡要濟  
衆方治小兒鵝口用馬牙硝擦舌上日五度效 梅

師方治火焰丹毒水調芒硝末塗之 信效方治死

胎不下用芒硝末二錢童便溫服 三因方治風熱

喉痺及纏喉風玉鑰匙用焰硝一兩半白殭蠶一錢

白礬砂半兩腦子一字研勻取少許數數吹之 普

濟方治重舌鵝口用竹瀝同焰硝點之

朴硝味苦辛寒大寒無毒主百病除寒熱邪氣逐六腑

積聚結固留癖胃中食飲熱結破留血閉絕停痰痞滿

推陳致新能化七十二種石煉餌服之輕身神仙煉之

白如銀能寒能熱能滑能澀能辛能苦能鹹能酸入地  
千歲不變色青白者佳黃者傷人赤者殺人

疏○朴硝乃初次煎成者其氣味烈於芒硝主治皆  
同總為除邪熱逐六腑積聚結固留癖胃中食飲停  
滯因邪熱結停痰痞滿破留血閉絕之要藥與芒硝  
功用曾無少別文具芒硝條下茲不復疏

### 主治叅互

聖惠方治時氣頭痛不止用朴硝二兩搗羅為散用

生油調塗於頂上 又方治乳石發動煩悶及諸風  
熱用朴硝煉成者半兩細研如粉每服以蜜水調下  
一錢七日三四服 簡要濟衆治小便不通膀胱熱  
白花散朴硝不以多少研為末每服二錢七溫茴香  
酒調下無時服 入紫雪療傷寒溫疫溫瘧一切積  
熱煩熱狂呼叫走瘴疫毒瀉卒死腳氣五尸五注心  
腹諸疾疔刺切痛解諸熱毒邪熱發黃蠱毒鬼魅野  
道執毒小兒驚癇百病黃金一百兩石膏寒水石磁



石滑石各三斤搗碎水一斛煮四斗去滓入犀角屑  
羚羊角屑青木香沈香各五兩玄參洗焙升麻各一  
斤炙甘草八兩丁香一兩入前汁中煮取一斗五升  
去滓入煉朴硝十斤消石三十二兩於藥汁中微火  
煎之用柳木不住攪至水氣欲盡傾水盆中待欲凝  
入麝香一兩二錢半硃砂末三兩攪勻收之每服一  
二錢涼水服臨時加減甚者一兩 碧雪治一切積  
熱天行時疾發狂昏憤或咽喉腫塞口舌生瘡心中

煩躁或大小便不通胃火諸病朴硝芒硝馬牙硝硝石石膏水飛寒水石水飛各一斤以甘草一斤煎水五升入諸藥同煎不住水攪令消鎔得所入青黛一斤和勻傾盆內經宿結成雪為末每含嚥或吹之或水調服二三錢欲通利則熱水服一兩 劉禹錫傳信方治熱壅甘露飲涼胸膈驅積滯芒硝末一大斤用蜜十二兩和勻入新竹筒內半筒已上即止不得令滿却入炊甑中令有藥處在飯內其虛處出在上

蒸之候飯熟取出綿濾入磁鉢內竹篦攪勻勿停手  
待凝取入磁盒每卧時含半匙漸漸嚥之如要通利  
即多服之 簡便方治赤眼腫痛朴硝置豆腐上蒸  
化取汁收點 外臺秘要治喉痺腫痛用朴硝一兩  
細細含嚥立效或加丹砂一錢氣塞不通加生甘草  
二錢半吹之 孫真人方治口舌生瘡用朴硝含之  
良 夏子益竒疾方灸瘡飛蝶因艾灸火瘡痂退落  
瘡內鮮肉片子飛如蝶狀騰空飛去痛不可言是血

肉俱熱怪病也用朴硝大黃各半兩為末水調下微利即愈 史記倉公傳云菑川王美人懷子不乳來召淳于意意往飲以葭若藥一撮以酒飲之旋乳意復診其脈躁躁者有餘病即飲以消石一劑出血豆比五六枚而安此去蓄血之驗也 炮炙論治頭痛欲死用消石末吹鼻中即愈 聖惠方治赤眼腫痛用消石末臨卧時以銅筋點黍米大入目眥至旦以鹽水洗去之

玄明粉味辛甘性冷無毒治心熱煩躁并五藏宿滯癥  
結明目退膈上虛熱消腫毒此即朴硝煉成者

疏○玄明粉即芒硝投滾湯沸化夜置冰霜之下結  
起在水面上者用白菜菔切片煮汁投硝以結起多  
次者為上其色瑩白其味辛鹹沈而降陰也入手少  
陰足厥陰陽明經其治邪熱在心煩躁者經曰熱淫  
於內治以鹹寒佐之以苦并主五臟宿滯癥結者即  
燥糞結痰瘀血宿食之謂辛能散結鹹能軟堅兼能

潤下苦能下洩故主之也目為血熱所侵必赤腫作痛異常硝性峻利加以苦辛鹹寒之極故能散熱結逐熱血目病既去必自明矣退膈上虛熱者當作實熱邪解心涼故熱退也消腫毒者即軟堅散結之功也

主治參互

集簡方熱厥氣痛玄明粉三錢熱童便調下 傷寒  
蘊要傷寒發狂玄明粉二錢朱砂一錢末之冷水服

聖濟總錄鼻血不止玄明粉二錢水服

簡誤

硝者消也五金八石其堅莫比惟硝能銷之苟非大辛至鹹極苦最烈之味其能消化之乎消石朴硝一經澄煉便名芒硝馬牙硝風化硝甜硝若經煨過即名玄明粉究其功用無堅不磨無結不散無熱不蕩無積不推可謂直往無前物無留礙之性也別錄謂煉餌服之輕身神仙失其本矣故仲景於諸承氣湯

用之非邪結下焦堅實不可按者不用恐其誤伐下  
焦真陰故也病不由於邪熱深固閉結難通斷不可  
輕投至於血涸津枯以致大腸燥結陰虛精乏以致  
大熱骨蒸火炎於上以致頭痛目昏口渴耳聾咽痛  
吐血衄血咳嗽痰壅虛極類實等證切戒勿施庶免  
虛虛之咎而無悔不可追之大錯也至如唐玄宗所  
召道士劉玄真謂服玄明粉遂無病長生中所載有  
益精壯氣助陽補陰不拘丈夫婦人幼稚襁褓不問



四時冷熱俱治之說迺是荒唐不經之語不識本草何緣載入豈歷代董脩儒臣本不知醫俱廣異聞未暇覈實而誤收之耶正所謂盡信書則不如無書也

滑石味甘寒大寒無毒主身熱洩瀉女子乳難癰閉利小便蕩胃中積聚寒熱益精氣通九竅六府津液去留

結止渴令人利中久服輕身耐饑長年

石韋為之使惡曾青

疏○滑石石中之得冲氣者也故味甘淡氣寒而無毒入足太陽膀胱經亦兼入足陽明手少陰太陽陽

明經用質之藥也滑以利諸竅通壅滯下垢膩甘以和胃氣寒以散積熱甘寒滑利以合其用是為祛暑散熱利水除溼消積滯利下竅之要藥本經用以主身熱洩瀉女子乳難蕩胃中積聚寒熱者解足陽明胃家之熱也利小便癃閉者通膀胱利陰竅也其曰益精氣久服輕身耐饑長年此則必無是理矣別錄通九竅津液去留結止渴令人利中者溼熱解則胃氣和而津液自生下竅通則諸壅自洩也丹溪用以

燥溼分水道實大腸化食毒行積滯逐瘀血解燥渴  
補脾胃降心火偏主石淋皆此意耳

主治參互

和甘草為益元散又名天水散六一散太白散解中  
暑傷寒疫癘并汗後遺熱勞復諸疾兼解兩感傷寒  
百藥酒食邪熱毒煩滿短氣腹脹悶痛淋悶澀痛療  
身熱嘔吐洩瀉腸癖下痢赤白除煩熱胸中積聚寒  
熱止消渴蓄水婦人催生下乳治吹乳乳癰牙瘡齒

疝此藥大養脾胃之氣通九竅六腑去留結通經脈  
消水穀安魂定魄乃神驗之仙藥也劉河間傷寒直  
格本方白滑石水飛過六兩粉甘草一兩為末每服  
三錢蜜少許溫水調下實熱則用新汲水下解利則  
葱豉湯下通乳用猪肉麩湯調下催生用香油漿水  
調下凡難產或死胎不下皆由風熱燥澀結滯緊斂  
不能舒緩故也此藥力至則結滯頓開而瘥矣如用  
以治痢照雷公炮製用牡丹皮同煮過加丹砂水飛

細末每兩一錢名辰砂六一散治心經伏暑下痢純  
血煩躁口渴神昏不爽 聖惠方治膈上煩熱多渴  
利九竅滑石二兩搗水三大盞煎二盞去滓入粳米  
煮粥食 千金方治女勞黃疸日晡發熱惡寒少腹  
急大便溏黑額黑滑石石膏等分研末大麥汁服方  
寸七日三小便大利愈腹滿者難治 聖惠方治乳  
石發動煩熱煩渴滑石粉半兩水一盞絞白汁頓服  
廣利方氣壅關格不通小便淋結臍下妨悶兼痛

滑石粉水調服一兩 楊氏產乳小便不通滑石末  
一升車前汁和塗臍之四畔方四寸乾即易之冬月  
水和 聖惠方治婦人轉胞因過忍小便而致滑石  
末葱湯服二錢 普濟方伏暑水泄白龍丸滑石火  
煨過一兩硫黃四錢為末麩糊丸菉豆大每用淡薑  
湯隨大小服 又方治伏暑或吐或瀉或瘡小便赤  
煩渴玉液散用桂府滑石燒四兩藿香一錢丁香一  
錢為末米湯服二錢亦治霍亂 王氏痘癩方治痘

瘡狂亂循衣摸床大渴引飲用益元散一兩加朱砂  
飛過二錢冰片三分麝香一分用燈心湯調二三錢  
服 普濟方治風毒熱瘡遍身出黃水桂府滑石末  
傅之次日愈先以虎杖豌豆甘草等分煎湯洗後乃  
搽 集簡方治脚指縫爛滑石一兩石膏煨半兩枯  
礬少許研摻之 夏子益奇疾方載白礬石條內

簡誤

滑石本利竅去溼消暑除熱逐積下水之藥若病人

因陰精不足內熱以致小水短少赤澀或不利煩渴  
身熱由於陰虛火熾水涸者皆禁用脾腎俱虛者雖  
作泄勿服

空青味甘酸寒大寒無毒主青盲耳聾明目利九竅通  
血脈養精神益肝氣療目赤痛去膚翳止淚出利水道  
下乳汁通關節破堅積久服輕身延年不老令人不忘  
志高神仙能化銅鐵鉛錫作金生益州山谷及越嵩山  
有銅處銅精熏則生空青其腹中空三月中旬採亦無



時

疏○空青感銅之精氣而結其味甘酸其氣大寒無  
毒可知已色青法木故入肝而主盲目者肝之竅  
瞳子神光屬腎肝腎虛則內熱怒則火起於肝故生  
內外障翳此目病所由成也甘寒能除積熱兼之以  
酸則火自斂而降矣熱退則障自消目自明耳者腎  
之竅水涸火炎故耳聾腎家熱解則火息水生而聽  
復聰矣九竅不利無非火壅肝家有火則血熱氣逆

故血脈不通涼肝除熱則精氣自益陰足火清則竅  
自利而血脈自通精神自長矣目赤痛膚翳淚出皆  
肝氣不足之候益肝氣則諸症自除矣其曰利水道  
下乳汁通關節破堅積者皆以熱除則氣血和平陰  
氣自復五臟清寧則諸證自解聖藥神功於斯顯矣

主治叅互

空青得真珠貝子珊瑚石決明點目中內外障翳有  
神 千金方眼目眈眈不明空青少許漬露一宿點

聖濟總錄 皮膚翳昏暗空青二錢 蕤仁去皮一兩片  
腦三錢 細研日點明目去翳障 上珍之藥一時難  
構明目外無別用故不著簡誤

紫石英味甘辛溫無毒主心腹欬逆邪氣補不足女子  
風寒在子宮絕孕十年無子療上氣心腹痛寒熱邪氣  
結氣補心氣不足定驚悸安魂魄填下焦止消渴除胃  
中久寒散癰腫令人悅澤久服溫中輕身延年

疏○紫石英稟土中之陽氣以生本經味甘氣溫無

毒別錄加辛雷公言大溫獨李當之言大寒者是味其性矣味厚於氣陽中之陰降也入手少陰手厥陰足厥陰經少陰主心屬陽而本熱虛則陽氣衰而寒邪得以乘之或為上氣欬逆或為氣結寒熱心腹痛此藥溫能除寒甘能補中中氣足心得補諸證無不瘳矣驚悸屬心虛魂魄不安亦由心君怯弱無以鎮壓諸經茲得鎮墜之力而心君有以鎮攝即重以去怯之義也其主女子風寒在子宮絕孕無子者蓋女

子繫胎於腎及心胞絡皆陰臟也虛則風寒乘之而不孕非得溫煖之氣則無以祛風寒而資化育之妙此藥填下焦走腎及心包絡辛溫能散風寒邪氣故為女人煖子宮之要藥補中氣益心肝通血脈鎮墜虛火使之歸元故又能止消渴散癰腫令人悅澤及久服輕身延年也凡入丸散用火煨醋淬七次碾末水飛過曬乾入藥

主治參互

同白薇艾葉白膠當歸山茱萸川芎香附治女人子  
宮虛寒絕孕無子 張文仲備急方虛勞驚悸補虛  
止驚令人能食紫石英五兩打如豆大水淘一遍以  
水一斗煮取三升細細服 仲景金匱方治風熱瘈  
瘲及驚癇風引湯紫石英白石英寒水石石膏乾薑  
大黃龍齒牡蠣甘草滑石等分咬咀水一升煎去三  
分食後溫呷無不效者

簡誤

紫石英其性鎮而重其氣煖而補故心神不安肝血不足及女子血海虛寒不孕者誠為要藥然而止可暫用不宜久服凡係石類皆然不獨石英一物也婦人絕孕由於陰虛火旺不能攝受精氣者忌用

赤石脂味甘酸辛大溫無毒主養心氣明目益精療腹痛洩瀉下痢赤白小便利及癰疽瘡痔女子崩中漏下產難胞衣不出久服補髓好顏色益智不饑輕身延年

白石脂功用大畧相同石脂有五色舊經同一條今用惟赤白二者餘皆不用

疏○赤石脂稟土金之氣而色赤則象火故其味甘酸辛氣大溫無毒氣薄味厚降而能收陽中陰也入手陽明大腸兼入手足少陰經經曰澀可去脫大小腸下後虛脫非澀劑無以固之故主腹痛腸澀及小便利女子崩中漏下也赤者南方之色離火之象而甘溫則又有入血益血之功故主養心氣及益精補髓好顏色也血足則目自明心氣收攝則得所養而下交於腎故有如上功能也癰疽因榮氣不從所生



瘡痔因腸胃溼熱所致甘溫能通暢血脈下降能滌  
除溼熱故主之也其主難產胞衣不出者以其體重  
下降而酸辛能化惡血惡血化則胞胎無阻滯之患  
矣東垣所謂胞衣不出澀劑可以下之此之謂也不  
饑輕身延年乃方士煉餌之法耳凡洩利腸癖久則  
下焦虛脫無以閉藏其他固澀之藥性多輕浮不能  
達下惟石脂體重而澀直入下焦陰分故為久利洩  
澀之要藥

主治參互

和劑局方冷痢腹痛下白凍如魚腦者桃花丸主之  
赤石脂煨研乾薑炮等分為末蒸餅為丸量大小服  
日三服 仲景方傷寒下利便膿血不止桃花湯主  
之赤石脂一片一半全用一半末用乾薑一兩粳米  
半升水七升煮米熟去滓每服七合納末方寸匕日  
三服愈乃止 千金翼方痰飲吐水無時節者其原  
因冷飲過度遂令脾胃氣弱不能消化飲食飲食入

胃皆變成冷水反吐不停赤石脂散主之赤石脂一斤搗篩服方寸匕酒飲自任稍加至三七服盡一斤則終身不吐痰水又不下利補五臟令人肥健有人患痰飲服諸藥不效用此遂愈病人虛者宜之

簡誤

火熱暴注者不宜用滯下全是溼熱於法當忌自非的受寒邪下利白積者不宜用崩中法當補陰清熱不可全仗收澀滯下本屬溼熱積滯法當祛暑除積

止澀之藥定非所宜慎之慎之

無名異味甘平無毒主金瘡折傷內損止痛生肌肉

疏○無名異稟地中陰水之氣以生本經味甘氣平  
無毒蘇頌鹹寒鹹能入血甘能補血寒能除熱故主  
金瘡折傷內損及止痛生肌肉也蘇頌醋摩傅腫毒  
癰疽者亦取其活血涼血之功耳

主治參互

集驗方打傷腫痛無名異為末酒服趕下四肢瘀血

皆散矣 多能鄙事損傷接骨無名異甜瓜子各一  
兩乳香沒藥各一錢為末每服五錢熱酒調服小兒  
三錢服畢以黃米粥塗紙上搽左顧牡蠣末裹之竹  
篦夾住 談野翁試效方臨杖預服無名異末臨時  
溫酒服三五錢則杖不甚痛亦不甚傷 除折傷腫  
毒外無他用故不著簡誤

綠礬涼無毒治喉痺虫牙口瘡及惡瘡疥癬釀鯽魚燒

灰和服療腸風瀉血

一名皂礬煨赤醋淬  
為礬紅又名青礬

疏○綠礬氣味所稟與白礬同其酸涌澀收燥溼解毒化涎之功亦與白礬相似而力差緩本經主喉痺者酸涌化涎之功也蚰蚩牙口瘡惡瘡疥癬者燥溼除熱解毒之功也腸風瀉血者消散溼熱之後復有收澀之功也然而諸治之外又善消積滯凡腹中堅肉積諸藥不能化者以礬紅同健脾消食藥為丸投之輒消

主治參互

得紅麴山查肉豆蔻消肉積加麥芽橘皮草果檳榔  
三稜蓬茂消一切肉積及米麪食堅積 脾病黃腫  
用綠礬四兩煨成赤珠子當歸四兩酒浸七日焙百  
草霜三兩為末以浸藥酒打糊丸梧子大每服五丸  
至七丸溫水下一月後黃去立效 楊真人濟急方  
酒黃水腫黃腫積痛青礬半斤醋一大碗和勻瓦盆  
內煨乾為度平胃散烏藥順氣散各半兩為末醋煮  
糊丸梧子大薑湯下二三十丸 救急方食勞黃病

身目俱黃青礬鍋內安炭煨赤米醋拌為末棗肉和  
丸梧子大每服二三十丸食後薑湯下 聖惠方腹  
中食積綠礬二兩研米醋一大碗瓷器煎之柳條攪  
成膏入赤脚烏一兩研丸菘豆大每空心溫酒下五  
丸 談野翁試效方走馬疔瘡綠礬煨紅以醋拌勻  
如此三次為末入麝香少許溫漿水漱淨搽之應加  
龍腦雄黃蓬砂芒硝

簡誤



綠礬礬紅雖能消肉食堅積然能令人作瀉胃弱人  
不宜多用服此者終身忌食蕎麥犯之立斃

鐵繡主惡瘡疥癬和油塗之蜘蛛蟲等咬和蒜磨傅之

鐵一名  
鐵衣

疏○鐵繡得金氣之英華其味應辛苦氣應寒惡瘡  
疥癬溼熱所生蜘蛛味蟲咬毒氣傷血辛苦能除溼熱  
寒能解熱毒氣故主之也又秘法取露天入土者研  
極細同蟾酥腦麝以金鍼刺入疔瘡中令至根然後

以藥塞入能拔疔根輒效蓋疔腫未有不因肝經風熱所致此藥屬金善能平木故有如是之功普濟方疔腫初起多年土內繡釘火煨醋淬刮下繡末研細略用少許人乳和挑破傅之

神農本草經疏卷三

欽定四庫全書

神農本草經疏卷四

明 繆希雍 撰

玉石部中品

總八十七種今疏其要者一十八種

雄黃

石硫黃

食鹽

水銀

石膏

金屑

靈砂

水銀粉

磁石

凝水石

陽起石

蜜陀僧

鐵落

珊瑚

瑪瑙

太陰玄精

土蜂窩上細土

胡燕窩內土

雄黃味苦甘平寒大溫有毒主寒熱鼠瘻惡瘡疽痔死  
肌療疥蟲蠱瘡目痛鼻中息肉及絕筋破骨百節中大  
風積聚癰氣中惡腹痛鬼疰殺精物惡鬼邪氣百蟲毒  
勝五兵殺諸蛇虺毒解藜蘆毒悅澤人面鍊食之輕身

神仙餌服之皆飛入人腦中勝鬼神延年益壽保中不  
肌得銅可作金

疏○雄黃稟火金之性得正陽之氣以生本經味苦  
平氣寒有毒別錄加甘大溫甄權言辛大毒察其功  
用應是辛苦溫之藥而甘寒則非也氣味俱厚升也  
陽也入足陽明經其主殺精物惡鬼邪氣及中惡腹  
痛鬼疰者蓋以陽明虛則邪惡易侵陰氣勝則精鬼  
易憑得陽氣之正者能破幽暗所以殺一切鬼邪勝

五兵也寒熱鼠瘻惡瘡疽痔死肌疥蟲匿瘡諸證皆  
溼熱留滯肌肉所致久則浸淫而生蟲此藥苦辛能  
燥溼殺蟲故為瘡家要藥其主鼻中息肉者肺氣結  
也癖氣者大腸積滯也筋骨斷絕者氣血不續也辛  
能散結滯溫能通行氣血辛溫相合而殺蟲故能疏  
通百節中大風積聚也虺蛇陰物藜蘆陰草雄黃稟  
純陽之氣所以善殺百蟲蛇虺毒及解藜蘆毒也別  
錄復有目痛及悅澤人面之語悉非正治鍊餌之法

出自仙經以銅為金亦黃白術中事耳

主治參互

同紅白藥子白及白斂乳香沒藥冰片傳一切腫毒  
癰疽 研細末入猪胆內套指頭上治天蛇疔毒發  
於中指 同金頭蜈蚣牛角腮猪懸蹄狷皮象牙末  
黃蠟白礬治通腸漏 同漆葉苦參刺蒺藜白芷荆  
芥天麻鼈蝨胡麻半枝蓮豨薟百部天門冬治大麻  
風眉毛脫落 治暑毒瘡痢百法不效用雄黃研細

水飛九次竹筒盛蒸七次再研蒸餅和丸梧子大每服甘草湯下七九日三服其辭云暑毒在脾溼氣通脚不洩則痢不痢則瘡獨煉雄黃蒸餅和藥別作治療醫家大錯此管人夢中所得之方今試之輒效

聖惠方傷寒狐惑蟲食下部痛痒不止雄黃半兩燒於瓶中熏其下部 肘後方五尸疰病發則變痛無常昏恍沈重纏結臟腑上衝心脇即身中尸鬼接引為害也雄黃大蒜各一兩杵丸彈子大每熱酒服一



丸 夏氏奇疾方筋肉蟲有蟲如蟹走於皮下作聲  
如小兒啼為筋肉之化雄黃雷丸各一兩為末摻猪  
肉上炙熟喫盡自安 積德堂方廣東惡瘡雄黃一  
錢半杏仁三十粒去皮輕粉一錢為末洗淨以雄猪  
胆汁調上二三日即愈百發百中天下第一方也出  
武定侯府內入龍腦少許尤良

簡誤

雄黃殺蛇蟲咬毒及傳疥癬惡瘡疔腫辟鬼魅邪氣

在所必用然而性熱有毒外用易見其所長內服難免其無害凡在服餌中病乃已毋盡劑也

石硫黃味酸溫大熱有毒主婦人陰蝕疽痔惡血堅筋骨除頭禿療心腹積聚邪氣冷痺在脇欬逆上氣脚冷疼弱無力及鼻衄惡瘡下部蟲瘡止血殺疥蟲

能乾永  
中其毒

者黑鉛煎湯解  
之或食冷猪血

疏○石硫黃稟火氣以生本經味酸氣溫有毒別錄大熱黃帝雷公鹹有毒氣味俱厚純陽之物也入手

厥陰經經曰寒淫於內治以溫熱冷痺在脇欬逆上  
氣寒邪在中也非溫劑無以除之又曰鞭則氣堅鹹  
以軟之心腹積聚邪氣堅積在中也非鹹劑無以軟  
之命門火衰則為脚冷痿弱無力下焦溼甚則為陰  
蝕疽痔蠹瘡酸溫能補命門不足大熱能除下焦溼  
氣故主之也其主頭禿惡瘡疥蟲者悉取其除溼殺  
蟲之功耳本經又主堅筋骨及別錄療鼻衄止血者  
皆非其所宜夫熱甚則骨消筋緩火載血上則錯經

妄行豈有大熱之物反能療是證哉無是理也

主治參互

入雞子同艾葉煮食治婦人白帶因於虛寒者 聖  
惠方諸瘡弩肉如蛇出數寸硫黃末一兩肉上薄之  
即縮 救急良方疥瘡有蟲硫黃末以雞子煎香油  
調搽極效

簡誤

硫黃古方未有服餌者本經所用止於治瘡蝕攻積

聚冷氣脚弱等而近世遂為常服丸散如來復丹半  
硫丸金液丹黑龍丹及諸方書所載者不可縷指稱  
其功用亦未能殫述然而人身之中陽常有餘陰常  
不足病寒者少病熱者多苟非真病虛寒胡可服此  
大熱毒藥假令果係虛寒證法當補氣以回陽亦何  
須藉此毒石哉世人徒知其取效良捷而不知其為  
害之酷烈也戒之戒之

食鹽味鹹溫無毒主殺鬼蠱邪疰毒氣下部匿瘡傷寒

寒熱吐胸中痰癖止心腹卒痛堅肌骨多食傷肺喜欬  
疏○鹽稟水氣以生洪範潤下作鹹素問水生鹹此  
鹽之根源也本經味鹹別錄鹹溫無毒察其本具氣  
味則是鹹寒而非溫也氣薄味厚陰也降也入足少  
陰亦入手少陰足陽明手太陰陽明經其主腸胃結  
熱喘逆胸中病及傷寒寒熱者皆熱邪在陽明也經  
曰熱淫於內治以鹹寒正此之謂也五臟苦欲補瀉  
云心欲軟急食鹹以軟之以鹹補之心虛則邪熱客

之而卒痛鹹寒能除熱補心故主心腹卒痛也凡溼  
熱在下焦則為蠱瘡留著經絡則肌骨軟鹹寒能除  
溼熱故主之也或以為鹹能軟堅又何以堅肌骨不  
知肌骨軟緩皆溼熱所致經曰熱則骨消筋緩又曰  
體重肘腫肉如泥皆屬於溼如夏月溼熱大盛則肉  
食易於潰散得鹽性之鹹寒乃能堅久不腐也鹹味  
涌泄所以能吐胸中痰癖及鬼蠱邪疰毒氣悉皆吐  
出也多食傷肺喜欬者肺主清肅多食則鹹味漬入

肺竅故令效也日華子以之助水臟及霍亂心痛金瘡明目止風淚邪氣一切蟲傷瘡腫火灼通大小腸療疝氣諸治悉取其入腎入心走血軟堅除熱潤下之功耳

主治參互

炒鹽三錢以炒砂仁五錢為末泡湯井水澄冷灌下治霍亂心腹絞痛有效一味炒作湯治心經火熱作痛 柳柳州纂救三死方治霍亂上不得吐下不



得瀉氣絕欲死者用鹽一大匙熬令黃童子小便一  
升合和溫服少頃吐下即愈也 孫真人方卒中尸

遁服鹽湯取吐效 甄權藥性論中惡心痛鹽如雞

子大青布裹燒赤納酒中頓服當吐惡物愈 唐瑤

經驗方風熱牙痛以槐枝煎濃湯二碗入鹽一斤煮

乾炒研日用揩齒以水洗目 梅師方蜈蚣咬人嚼

鹽塗之或鹽湯洗之妙 經驗方蚯蚓咬毒形如大

風眉髮皆落惟濃煎鹽湯浸身數遍即愈浙西將軍

張韶病此每夕蚯蚓鳴於體一僧用此方而安蚯蚓  
畏鹽故也

簡誤

內經曰鹹走血血病無多食鹹多食則脈凝泣而色  
變凡血病及喘嗽水腫消渴法所大忌以其或傷肺  
引痰或泣血脈或助水邪或走精液故也

水銀味辛寒有毒主疥癬痂瘍白禿殺皮膚中蟲墮胎  
除熱以傅男子陰陰殺無氣殺金銀銅錫毒鎔化還復

為丹久服神仙不死一名汞

得鉛則凝得硫則結併棗肉人唾研則散別法煨為

臧粉粉霜得紫河車則伏得川椒則收

疏○水銀從石中迸出為石汞從丹砂中出者為硃  
裏汞即丹砂中液也稟至陰之氣而有汞故其味辛  
其氣寒而有毒善能殺蟲其性下走無停歇故本經  
以之主疥癩痂瘍白禿殺皮膚中蝨及墮胎除熱也  
至陰之精能消陽氣故不利男子陰也神仙不死之  
說必得鉛華相合乃能收攝真氣凝結為丹即道家

所謂太陽流珠常欲去人卒得金華轉而相因之旨也伏鍊五金為泥以其性能殺金銀銅錫毒也鎔化還復為丹亦出仙家烹鍊耳

主治參互

得礬石丹砂芒硝雄黃黑鉛入陽城罐內如法昇煉名紅粉霜能止痛生肌少加冰片研勻擦廣瘡有效製法具礬輕粉 同大風子蛇床子樟腦輕粉枯礬雄黃胡桃油治疥癬蟲瘡 肘後方一切惡瘡水銀

黃連胡粉熬黃各一兩研勻傅之乾則以唾調

簡誤

陳藏器曰水銀入耳能食人腦至盡入肉令百節攣  
縮倒陰絕陽人患瘡疥多以水銀塗之性滑重直入  
肉宜謹之頭瘡切不可用恐入經絡必緩筋骨寇宗  
奭云水銀入藥雖各有法極須審謹有毒故也歷舉  
學士大夫惑於方士之說服煅鍊水銀而暴卒者不  
可勝數婦人誤服多致絕孕其為毒害昭昭矣惟宜

外敷不宜內服入口為厲可不戒哉

石膏味辛甘微寒大寒無毒主中風寒熱心下逆氣驚喘口乾舌焦不能息腹中堅痛除邪鬼產乳金瘡除時氣頭痛身熱三焦大熱皮膚熱腸胃中膈氣解肌發汗止消渴煩逆腹脹暴氣喘息咽熱亦可作浴湯

堅白明瑩者良

浙人呼為寒水者真

疏○石膏稟金水之正得天地至清至寒之氣故其味辛甘其氣大寒而無毒陰中之陽可升可降入足

陽明手太陰少陽經氣分辛能解肌甘能緩熱大寒而兼辛甘則能除大熱故本經主中風寒熱熱則生風故也邪火上衝則心下有逆氣及驚喘陽明之邪熱甚則口乾舌焦不能息邪熱結於腹中則腹中堅痛邪熱不散則神昏譫語同乎邪鬼肌解熱散汗出則諸證自退矣惟產乳金瘡非其用也別錄除時氣頭痛身熱三焦大熱皮膚熱腸胃中膈氣解肌發汗止消渴煩逆腹脹暴氣喘息咽熱者以諸病皆由足

陽明胃經邪熱熾盛所致惟喘息咽熱略兼手太陰病此藥能散陽明之邪熱降手太陰之痰熱故悉主之也甄權亦用以治傷寒頭痛如裂壯熱如火日華子用以治天行熱狂頭風旋暈齒東垣用以除胃熱肺熱散陽邪緩脾益氣者邪熱去則脾得緩而元氣回也潔古又謂止陽明經頭痛發熱惡寒日晡潮熱大渴引飲中暑及身痛者無非邪在陽明經所生病也理陽明則茂不濟矣足陽明主肌肉手太陰主皮



毛故又為發斑發癩之要品起死回生功同金液若  
用之少則難責其功世醫罔解茲特表而著之

主治叅互

仲景白虎湯專解陽明邪熱其證頭疼壯熱口渴煩  
躁鼻乾目眴眴不得眠畏人聲木聲畏火若勞役人  
病此元氣先虛者可加人參名人參白虎湯發癰陽  
毒盛者白虎湯加竹葉麥門冬知母以石膏為君自  
一兩至四兩麥門冬亦如之知母自七錢至二兩竹

葉自百斤至四百斤粳米自一大撮至四大撮甚則  
更加黃連黃蘗黃芩名三黃石膏湯自一劑至四劑  
婦人妊娠病此者亦同 傷寒汗後煩熱不解竹葉  
石膏湯主之 小兒痧癘發熱口渴唇焦咳嗽多嚏  
或多痰或作泄竹葉石膏湯加赤檉木枝兩許貝母  
栝樓根各二三錢主之發癩亦同甚者加三黃 瘧  
疾頭痛壯熱多汗發渴亦用竹葉石膏湯二三劑主  
之虛者加人參後隨證施治 中暑用白虎湯虛者

加人參 太陽中暈亦用竹葉石膏湯 胃家實熱  
或嘈雜消渴善飢齒痛皆須竹葉石膏湯主之

簡誤

石膏本解實熱祛暑氣散邪熱止渴除煩之要藥溫  
熱二病多兼陽明若頭痛遍身骨痛而不渴不引飲  
者邪在太陽也未傳陽明不當用七八日來邪已結  
裏有燥糞往來寒熱宜下者勿用暑氣兼溼作泄脾  
胃弱甚者勿用瘧邪不在陽明則不渴亦不宜用產

後寒熱由於血虛或惡露未盡骨蒸勞熱由於陰精不足而不由於外感金瘡下乳更非其職宜詳察之竝勿誤用

金屑味辛平有毒主鎮精神堅骨髓通利五臟除邪毒

氣服之神仙

寇宗奭曰不曰金而更屑字者是已經磨屑可用之義必須烹鍊鍛屑為箔方可入

藥蘇頌曰金屑古方不見用惟作金箔入藥甚便又古方有金石凌紅雪紫雪輩皆取金銀煮汁此通用經煉者假其氣爾生金有毒能殺人且難解有中其毒者惟鷓鴣肉可解之性惡錫畏水銀

疏○金屑稟西方剛利之性善能制木體重而降亦

能鎮心。心氣怯則驚，邪易入精神不安。五臟皆為之病。肝經風熱則為驚，癇失志，魂魄飛揚，肝屬木而畏金，與心為子母之臟，故其病同一源，治亦同法。本經主鎮驚，通利五臟，邪氣及甄權療小兒驚傷五臟風癇失志，鎮心安魂魄者，亦兼實則瀉其子之義也。本經又主堅骨髓者，以肝心平風熱退，則精血生骨髓自堅矣。服之神仙乃出自仙經，非醫方所述也。

主治參互

入至寶丹治中風不語氣絕中惡蠱毒尸疰難產血  
暈等證 入牛黃清心丸治諸風緩縱不隨語言蹇  
澁恍惚怔忡痰涎壅塞驚恐怕怖或喜怒無時癲狂  
昏亂 入紫雪治內外煩熱口舌生瘡狂呼叫走瘡  
疫毒癘卒死溫瘧五尸五疰蠱毒卒黃小兒驚癇百  
病紅雪治療略同 金箔鎮心丸治小兒風壅痰熱  
驚悸譫妄心神不寧 磨細屑挑開疔瘡頭上沒入  
能拔疔根作鍼鍼疔瘡納藥拔疔

簡誤

太清法云金稟中宮陰已之氣性本剛服之傷肌損骨予見今之以難求死者服金一二分則心腹刺痛腸胃如裂而斃其為損傷肌骨槩可見矣惟作箔入藥可為鎮心安神之用如或止因心氣虛以致神魂不安並無驚邪外人者當以補心安神為急而非金箔所能定矣

靈砂味甘溫無毒主五臟百病養神安魂魄益氣明目

通血脈止煩滿益精神殺精魅惡鬼氣久服通神明不老輕身神仙令人心靈一名二氣砂

疏○靈砂硫汞制而成乃水火既濟二氣交合奪造化之功竊陰陽之妙可以變化五行升降氣血為除邪養正扶危救急之靈丹也故能主五臟百病益精神安魂魄及益氣養神也其主明目通血脈止煩滿殺精魅惡鬼氣者特其餘事耳得陰陽之妙故能令人心靈心靈則神明自通不老輕身神仙所自來矣



又能主上盛下虛痰涎壅盛頭旋吐逆霍亂反胃心  
腹冷痛諸證更為鎮墜之神丹也 修治用水銀一

雨硫黃六銖細研炒作青砂頭後入水火既濟爐抽  
之如束鍼紋者成就也又按胡演丹藥秘訣云升靈  
砂法用新鍋安逍遙爐上蜜揩鍋底文火下燒入硫  
黃二兩鎔化投水銀半斤以鐵匙急攪作青砂頭如  
有焰起噴醋解之待汞不見星取出細研盛入水火  
鼎內鹽泥固濟下以自然火升之乾水十二盞為度

取出束鍼紋者成矣

主治叅互

錢氏小兒方霍亂吐逆不問虛實冷熱二氣散一名  
青金丹用水銀硫黃等分研不見星每服一字生薑  
湯調下 直指方冷氣心痛靈砂三分五靈脂一分  
為末稀糊丸麻子大每服二十九食前石菖蒲生薑  
湯下 又方九竅出血因暴驚而得其脈虛者靈砂  
丹三十粒人參湯下三服愈此證不可認作血得熱

則妄行而用涼藥誤矣何者驚則氣浮神魂發越陽  
氣暴壅故也得鎮墜則神魂復安而血自循經矣  
和劑局方有養正丹又名交泰丹用黑鉛硃砂水銀  
硃黃炒成即靈砂意也其用亦與靈砂略同

簡誤

靈砂雖稱水火既濟陰陽配合然而硃汞有毒性亦  
下墜止可藉其墜陽交陰却病于一時安能資其養  
神益氣通靈于平日哉凡胃虛嘔吐傷暑霍亂肺熱

生痰病屬于虛非關驟發者咸在所忌

水銀粉味辛冷無毒主通大腸傅小兒疳痺癩癧殺瘡

疥癬蟲及鼻上酒皴風瘡瘙痒又名汞粉輕粉膩粉

畏磁

石石黃忌一切血本出於丹砂故也土茯苓黑鉛鐵漿可制其毒

疏○水銀粉升鍊水銀而成其味本辛氣冷無毒療

體與水銀相似第其性稍輕浮爾大腸熱燥則不通

小兒疳痺因多食甘肥腸胃結滯所致辛涼總除腸

胃積滯熱結故主之也其主療癩瘡疥癬蟲及鼻上

酒皴風瘡瘙痒者皆從外治無非取其除熱殺蟲之  
功耳 升煉輕粉法用水銀一兩白礬二兩食鹽一  
兩同研不見星鋪於鐵器內以小烏盆覆之鹽泥封  
固盆口以炭火打三炷香取開則粉升於盆上矣

主治叅互

活幼口議小兒吮乳不止服此立效膩粉一錢鹽豉  
七粒去皮研勻丸麻子大每服三丸藿香湯下 經  
驗方小兒喫泥及膿肚用膩粉一分砂糖和丸麻子

大空心米飲下一丸良久泄出泥土瘡 聖惠方大  
小便閉脹悶欲死二三日則殺人膩粉一錢生麻油  
一合相和空心服 萬表積善堂方下疳陰蝕瘡輕  
粉末乾摻之即結靨而愈 永類鈐方臙瘡不合葱  
汁調輕粉傅之 又秘法升丹靈藥方治癰疽惡瘡  
楊梅諸瘡拔毒長肉神驗水銀一兩黑鉛七錢硃砂  
雄黃各三錢白礬火硝各二兩半其法先用鉛化開  
投水銀凝成餅入硃砂雄黃研勻然後將硝礬鎔化

投前四味末入內離火急攪令勻用陽城碓盛之鐵  
盞蓋口上架鐵梁錢線紮緊鹽泥固濟神仙爐內文  
武火升鍊盞中時時以水擦之火漸加以三分為率  
每焚官香一炷則加一分如是鍊三炷官香為度候  
冷取開於盞底刮取研如飛麩甘草湯飛過三次入  
龍腦香少許點廣瘡上數數以指蘸藥按之三日自  
脫神方

簡誤

水銀粉下膈涎消積滯并小兒涎潮瘈瘲藥多用然  
而其性有毒走而不守若服之過劑或不得當則毒  
氣熏蒸竄入經絡筋骨莫之能出痰涎既去血液隨  
亡筋失所養營衛不從變為筋攣骨痛或結腫塊漏  
瘡或手足皸裂頑痺等證遂成痼疾貽害無窮蓋此  
物本成於汞則汞之毒尚存又得火煅則火之毒氣  
未出本經言其無毒誤也凡閉結由於虛血不能潤  
澤小兒疳病脾胃兩虛小兒慢驚痰涎壅上楊梅結



毒發於氣虛久病之人咸不宜服宗奭有云病屬於驚尤須審謹蓋驚為心氣不足不可下下之裏虛驚氣入心不可治其人本虛便須禁此慎之至也

磁石味辛鹹寒無毒主周痺風溼肢節中痛不可持物洗洗酸消除大熱煩滿及耳聾養腎藏堅骨氣益精除煩通關節消癰腫鼠瘻頸核喉痛小兒驚癇鍊水飲之

亦令人有子一名玄石

即吸銹石入藥須火燒醋淬研末水飛或醋煮三日夜

疏○磁石生於有鐵處得金水之氣以生本經味辛

氣寒無毒別錄甄權鹹有小毒大明甘瀼平藏器鹹  
溫今詳其用應是辛鹹微溫之藥而甘寒非也氣味  
俱厚沈而降陽中陰也入足少陰兼入足厥陰經其  
主周痺風溼肢節中痛不可持物洗洗酸者皆風寒  
溼三氣所致而風氣尤勝也風淫末疾發於四肢故  
肢節痛不能持物風溼相搏久則從火化而骨節皮  
膚中洗洗酸也辛能散風寒溫能通關節故主之也  
鹹為水化能潤下軟堅辛能散毒微溫能通行除熱

故主大熱煩滿及消癰腫鼠瘻頸核喉痛者足少陽  
少陰虛火上攻所致鹹以入腎其性鎮墜而下吸則  
火歸元而痛自止也夫腎為水臟磁石色黑而法水  
故能入腎養腎臟腎主骨故能強骨腎藏精故能益  
精腎開竅於耳故能療耳聾腎主施泄久秘固而精  
氣盈益故能令人有子小兒驚癇心氣怯痰熱盛也  
鹹能潤下重可去怯是以主之甄權云補男子腎虛  
風虛身強腰中不利加而用之宗爽云養腎氣填精

髓腎虛耳聾目昏者皆用之

主治叅互

直指方耳卒聾閉吸鐵石半錢入病耳內鐵砂末入  
不病耳內自然通透 千金方陽事不起磁石五斤  
研清酒漬二七日每服三合日二夜一 倪微德原  
機啟微集眼昏內障神光寬大漸散昏如霧露中行  
漸睹空花物成二體久則光不收及內障磁硃丸真  
磁石火煨醋淬七次二兩硃砂一兩神曲生用三兩

為末更以神麩末一兩煮糊加蜜丸梧子大每服二  
十九空心飯湯下 千金方金瘡血出磁石末傅之  
止痛斷血 諸藥石皆有毒且不宜久服獨磁石性  
稟沖和無猛悍之氣更有補腎益精之功故不著簡  
誤大都漬酒優於丸散石性體重故爾

凝水石味辛甘寒大寒無毒主身熱腹中積聚邪氣皮  
中如火燒煩滿水飲之除時氣熱盛五臟伏熱胃中熱  
煩滿止渴水腫小腹痺久服不饑一名寒水石一名白

水石色如雲母可析者良鹽之精也

石膏亦名寒水石與此不同

疏○凝水石生於鹵地稟積陰之氣而成本經味辛氣寒別錄加甘大寒無毒經曰小熱之氣涼以和之大熱之氣寒以取之又曰熱淫於內治以鹹寒大寒微鹹之性故主身熱邪氣皮中如火燒煩滿及時氣熱盛五臟伏熱胃中熱也易飢作渴亦胃中伏火也甘寒除陽明之邪熱故能止渴不饑水腫者溼熱也小便多不利以致水氣上溢於腹而成腹痺辛鹹走

散之性故能除熱利竅消腫也療腹中積聚者亦取其辛散鹹軟之功耳

主治參互

永類方男女轉脬不得小便寒水石二兩滑石一兩  
葵子一合為末水一斗煮五升時服一升即利 經  
驗方小兒丹毒皮膚熱赤寒水石半兩白土一分為  
末米醋調塗之

簡誤

凝水石按本文云鹽之精則與石膏方解石大相懸  
絕矣因石膏有寒水石之名而王隱君復云寒水石  
又名方解石以致混淆難辨其功能各不同用者自  
宜分別生鹵地味辛鹹碎之如朴硝者是凝水石其  
氣大寒能除有餘邪熱凡陰虛火旺咳嗽吐血多痰  
潮熱骨蒸并脾胃作泄者不宜服經曰諸腹脹大皆  
屬於熱者宜之諸溼腫滿屬脾土者忌之大宜詳審  
慎勿有誤



陽起石味鹹微溫無毒主崩中漏下破子藏中血癥瘕  
結氣寒熱腹痛無子陰痿不起補不足療男子莖頭寒  
陰下溼痒去臭汗消水腫久服不飢令人有子

白色瑩  
明若狼

牙者為上凡用火煨酒  
淬七次研細水飛日乾

疏○陽起石稟純陽之氣以生本經味鹹氣微溫無  
毒觀圖經所載齊州陽起山其山常有煖氣雖盛冬  
大雪徧境獨此山無少積蓋石氣熏蒸也其為氣之  
溫煖當不甚微矣味鹹而氣溫入右腎命門補助陽

氣并除積寒宿血留滯下焦之聖藥故能主崩中漏下及破子臟中血癥瘕結氣寒熱腹痛及男子莖頭寒陰痿不起陰下溼痒令人有子也真陽足則五臟之氣充溢邪溼之氣外散故久服不飢并去臭汗也別錄又主消水腫者蓋指真火歸元則能煖下焦熏蒸糟粕化精微助脾土以制水也

主治叅誤

同破故紙鹿茸脛肭臍菟絲子狗陰莖肉菴容巴戟

天治命門虛寒陰痿不起精寒無嗣服之能令陽道  
豐隆使人有子總治男子九醜之疾

簡誤

陰虛火旺者忌之陽痿屬於失志以致火氣閉密不  
得發越而然及崩中漏下由於火盛而非虛寒者竝  
不得服

蜜陀僧味鹹辛平有小毒主久痢五痔金瘡面上癩黥

面膏藥用之

舊出南閩中銀銅治處今甚難  
得但取煎銷銀鋪鑪底用之

疏○蜜陀僧感銀銅之氣而結故其味鹹辛氣平有  
小毒久痢五痔大腸溼熱積滯也辛主散結滯鹹主  
潤下除熱大腸清寧則久痢五痔自瘳矣體重能消  
磨堅積味鹹能入血涼血故又主金瘡及滅面上癩  
黥也

主治參互

聖惠方鼻皴赤炮蜜陀僧二兩細研人乳調夜塗旦  
洗活人心鑑夏月汗癩如癩用蜜陀僧八錢雄黃

四錢先以薑片擦熱仍以薑片蘸末擦之次日即焦  
壽域方骨疽出骨一名多骨瘡不時出細骨乃母  
受胎未及一月與六親骨肉交合感其精氣故有多  
骨之名以蜜陀僧末桐油調勻攤貼之即愈

簡誤

蜜陀僧惟治黧黯傅面外今人無復用以服食者大  
都可外敷不可內服此藥難得真者銷銀爐底乃硝  
銅之氣所結能爛一切物故益不宜輕用

鐵落味辛甘平無毒主風熱惡瘡瘍疽瘡痂疥氣在皮膚中除胸膈中熱氣食不下止煩去黑子可以染皂

疏○鐵落是鍛家燒鐵赤沸砧上煨之如皮甲落下者本出於鐵不離金象體重而降故素問有生鐵落飲以療病狂怒者云生鐵落下氣疾也又狂怒屬肝氣暴升故取金氣以制之也其主氣在皮膚中及除胸膈中熱氣食不下止煩者皆制本散熱之功也本經又主風熱惡瘡瘍疽瘡痂疥者皆肝心火熱所致

辛平能除二經之火熱故主之也蘇恭以之炒熱投酒中飲療賊風瘧大明治驚邪癲癇小兒客忤並煎服之悉此意耳

主治參互

鐵稱錘燒紅淬入米泔中百次乘熱熏洗陰癬頑瘡皆有効別敷殺蟲涼血藥彌佳

珊瑚味甘平無毒主宿血去目中翳鼻衄末吹鼻中

疏○珊瑚得水中之陰氣以生味甘氣平性主消散

故能去目中翳及消宿血止鼻衄也

主治參互

同貝子真珠瑪瑙琥珀石蟹為極細末點入目中去  
膚翳 甘平無毒主療亦稀故無簡誤

馬瑙味辛寒無毒主辟惡熨目赤爛

疏○瑪瑙王之屬也觀陳藏器云砑木不熱其性寒  
可知矣寒而帶辛故能辟惡及熨目赤爛也同珊瑚  
輩為末點目去障翳尤妙



太陰玄精味鹹溫無毒主除風冷邪氣溼痺益精氣婦人瘡冷漏下心腹積聚冷氣止頭疼解肌其色青白龜背者良

疏○大陰玄精出於鹽鹵之地乃至陰之精凝結而成故其形皆六出象老陰之數也本經味鹹氣溫無毒然詳其所主味應帶辛氣應作寒非辛寒則不能除風冷邪氣溼痺及止頭疼解肌等證鹹能軟堅故主心腹積聚鹹能潤下入腎滋水故主益精氣本經

誤認為溫故有婦人瘕冷漏下冷氣之治皆非所宜也

主治參互

圖經本草正陽丹治傷寒三日頭疼壯熱四肢不利  
太陰玄精石硝石硫黃各二兩蓬砂一兩細研入瓶  
固濟以火半斤於瓶子周一寸煖之約近半日候藥  
青紫色住火待冷取出用臘月雪水拌勻入罐子中  
屋後北陰下陰乾又入地埋二七日取出研細麩糊

九雞頭實大先用熱水浴後以艾湯研下一丸以衣  
蓋汗出為瘥 入來復丹治緩急諸病但有胃氣無  
不獲安

簡誤

傷寒陰證不宜服鹹能走血用以引經入腎則可多  
則反瀉腎傷血矣血病無多食鹹戒之

土蜂窩上細土

本經無氣味云主腫毒醋和為泥傅之亦主蜘蛛咬

必是甘平無毒之物甘為土化故能解諸毒也

胡燕窩內土無毒主風瘙癢癰瘡及惡刺瘡浸淫及遍身至心者死竝水和敷之

疏○胡燕即玄鳥春分後至窠取四方溼土為之其氣味必甘寒故藏器以之療諸瘡瘍蓋諸痛痒瘡瘍皆屬心火而甘寒最能解火毒土性能化一切毒故也

主治參互

入回燕膏貼療癰有效回燕者朝北燕窠土也

神農本草經疏卷四